

han-hemen

Lapurtzeari utzi diote beren argazkiak zintzilikaturik ikusi dituztenean

Polonian, Gdyniako supermerkatu bateko jabea, Mieczyslaw Radkell, etsita zegoen, bere dendan lapurtzen zutenak zein ziren bazekielako, baina Poliziak ez ziolako laguntzarik ematen, antza. Hala, lapurren argazki handiak bere dendan zintzilik jartzea bururatu zitzaion, eta neurri horrek fruituak eman omen ditu. «Nire bezeroek lapurren aurpegiak lapurreta egiten ari zirela ezagutzen nahi nuen», azaldu du Mieczyslaw Radkellek. Jabeak, esan duenez, kamera sistema bat jarri zuen dendan, eta harekin argazkiak egin zien usteko lapurrei.

Gogoko ez zuen bidaiari bati ez ziolako aterik zabaldu kaleratu dute autobus gidari bat

Kataluniako Auzitegi Gorena bat etorri da autobus gidari baten kaleratzearekin. Gidariak ez zizkion zabaldu bidaiari bati autobuseko ateak, «gogoko ez zuelako». Bidaiari hori gidariaren konpainian egiten zuen lan. 2001eko urrian gertatu zen: gidaria geltokira iristear zen, eta metro batzuk lehenago ohartu zen hantxe zela gogoko ez zuen lankidea. Hala, geldialdia egiteko lekura iritsi aurretik zabaldu zizkien ateak jaitsi nahi zutenei, eta ondoren bere lankidea zegoen geltokian geratu gabe iragan zen. Bidaiaria autobusa hartzen saiatu zen, baina lurrera erori zen, eta hainbat zauri egin zituen.



FREDERICK J. BROWN / EPA

Ilargi urte berriko oporrak

Txinatarrak ilargi urte berrian sartu ziren joan den astean, eta, horrekin batera, urtean duten atsedenaldi bakarrenetakoari ekin zioten. Armadako hainbat soldadu ere oporretan dira, eta horietako batzuek Tiananmen plazan argazkiak atera zituzten atzo.



J.C. CARDENAS / EFE

Musika CDan izateko aukera aparta

Vicente Ortik eta Roberto Herraizek bini-loan eta kaseteen dagoen musika CDan grabatzen duen makina asmatu zuten. Atzo, berriz, makina horiek alokatzen dituen lehen denda zabaldu zuten.



YUI MOK / EPA

Courtney Love eta Chelsea Clinton bikote bitxia, Londresko festa batean

Londresko The Old Billingsgate Fish Market aretoan festatxo bat egin zuten atzo, eta bertan jende ezagun asko izan zen. Courtney Love—duela egun gutxi atxilotu zuten— eta Chelsea Clinton, esaterako, elkarrekin izan ziren.

Michael Jacksonek esan du «saldu» egin dutela telebistarako dokumental batean

«Suntsituta eta salduta» ikusten du bere burua Michael Jacksonek, bart AEBetako telebista kate batean eman zuten dokumental bat dela eta. Horretan, Jacksonek onartu du «haurrekin batera» lo egiten duela, eta adierazpen horrek hautsak ederki harrotu ditu. «Nire seme-alabak eta ni ezagutu gaituen pertsonak, egia eta bihotza eman diodan pertsonak, saldu egin nau eta suntsitu egin nau», esan du Jacksonek.


Dustin Hoffmanek dio botere, petrolio eta diruarengatik egin nahi dutela gerra

AEBetako aktore Dustin Hoffmanen ustez, Irakeko gerra, beste gerra asko bezalaxe, «diru, botere eta petrolioarengatik» egin nahi dute. Herenegun, Londresen, Hoffmanek Empire Film Award saria jaso zuen, eta saria jaso osteko adierazpenetan eman zuen Irakeko gerraren inguruko iritzia. Bere herrialdeak gerrari ekingo balio beste gatazka asko ere hasteko bidean izango liratekeela esan zuen Hoffmanek, India, Pakistan eta Korea aipatuz.

hilberriak

ESKELAK

Gaueko 9ak arte hartzen dira



(0034) 943 300 222